

欽定重修兩浙鹽法志

欽定重修兩浙鹽法志卷二十

沿革二

元史食貨志太宗庚寅年始行鹽法每鹽一引重四百斤其價銀一十兩世祖中統二年減銀爲七兩至元十三年旣取宋而江南之鹽所入尤廣每引改爲中統鈔九貫二十六年增爲五十貫元貞丙申每引又增爲六十五貫至大己酉至延祐乙卯七年之間累增爲一百五十貫凡僞造鹽引者皆斬籍其家產付告人充賞犯私鹽者徒二年杖七十止籍其財產之

半有首告者於所籍之內以其半賞之行鹽各有郡
邑犯界者減私鹽罪一等以其鹽之半沒官半賞告
者

元史食貨志兩浙之鹽至元十四年立運司歲辦九萬
二千一百四十八引每引分作二帑每帑依宋十八
界會子折中統鈔九兩十八年增至二十一萬八千
五百六十二引十九年每引於舊價之上增鈔四貫
元史百官志至元十四年置司杭州大德三年定其產
鹽之地立場有差仍於杭州嘉興紹興溫台等處設

檢校四所專驗鹽俾毋過常度鹽場三十四所仁和
場許村場西路場下砂場青村場袁部場浦東場橫
浦場蘆瀝場海沙場鮑郎場西興場錢清場三江場
曹娥場石堰場鳴鶴場清泉場長山場穿山場岱山
場玉泉場蘆花場大嵩場昌國場永嘉場雙穗場天
富南監長林場黃巖場杜瀆場天富北監長亭場龍
頭場

元史世祖紀至元十九年四月議設鹽使司賣鹽引法
擇利民者行之仍令按察司磨刷運司文卷五月遣

浙西道宣慰司同知劉宣等理算各鹽運司出納之數十月增兩浙鹽價十二月罷解鹽司及諸鹽司令運司官親行調度鹽引二十年四月申私鹽之禁許按察司糾察鹽司二十二年正月立諸路常平鹽鐵都轉運司三月詔依舊制凡鹽一引四百斤價銀十兩以折今鈔爲二十貫

元典章至元二十二年十一月中書省咨請欽依鹽局官從各處官司近上戶計內選保有抵業人通商賈信實不作過犯之人充每局大使一員副使一員鹽

局房舍於各處係有官房內從便標撥如無係官錢
內起蓋合賣年銷鹽數驗各處人戶多寡斟酌可用
鹽帑開坐數目移行宣慰司總管府各差管押官一
員齋擊公文將引各處局官前去合於運使關切支
撥交割明白到局若有短少著落原關局官賠償如
是在場鹽數不敷分作兩次搬運合用腳力運司就
便和雇仍將賣過鹽引逐旋申繳本路轉申省部合
設鹽局除各縣置立一處外各路并戶多州郡及人
煙湊集官市可以添設去處本路就便斟酌設立

元史世祖紀至元二十六年八月詔兩淮兩浙都轉運使司諸人毋得沮辦鹽課十月尙書省臣言沙不丁以便宜增置浙東二鹽司合浙東西舊所立者爲七乞官知鹽法者五十六人從之閏十月尙書省臣言南北鹽均以四百斤爲引今權豪家多取至七百斤莫若先貯鹽於席來則售之爲便從之桑哥言初改至元鈔欲盡收中統鈔故令天下鹽課以中統至元鈔相半輸官今中統鈔尙未可急斂宜令稅賦並輸至元鈔商販有中統料鈔聽易至元鈔以行然後中

統鈔可盡從之

元典章至元二十九年中書省照到辦課條畫兩淮兩浙運司辦課其間諸衙門無得擾攪沮壞亦不得將辦課官吏擅自差占勾攝之准兩浙運鹽綱船車輛并辦課官吏巡鹽弓手騎坐馬匹諸人不得奪要拘撮如有違犯之人從行省就便科斷

元史食貨志至元三十年置局賣鹽魚鹽於海濱漁所三十一并煎鹽地四十四所爲三十四場

續文獻通考至元三十一年增捕私鹽人賞格禁諸司

豪奪鹽船遞運官物僧道權勢之家私匿鹽販

續文獻通考世祖舊制鹽亭竈戶三年一比附推排任事者恐斂怨久不舉行王都中請於行省徧歷三十四場驗其物力高下以損益之役亦平而課亦足公私便之

舊兩浙鹺志草木子云世祖立鹽法瀕海州郡立場差官主治差鹽亭戶煎鹽至十月結場住煎及額而止鹽商於各省府運司買就處鹽場支鹽後鹽積不售均派戶口收買令其入錢縣官收市其中貧富不等

皆令入錢吏胥並緣爲姦民甚苦之皆言其不便事
尋罷復令富商收市

元史成宗紀元貞元年閏四月罷各處鹽使司鹽場改
設司令司丞十月給江浙河南巡邏私鹽南軍兵仗
二年七月詔茶鹽轉運司仍舊以三年爲代八月命
江浙行省以船五十艘水工千三百人沿海巡禁私
鹽九月增鹽價鈔一引爲六十五貫鹽戶造鹽錢爲
十貫罷民間鹽鐵鑪竈

元史食貨志大德三年立兩浙鹽運司檢校所四五年

增額爲四十萬引至大元年又增餘鹽五萬引

元史成宗紀大德七年二月禁內外中書省戶部轉運司官不得私買鹽引

續文獻通考大德十一年中書省臣言比獻寶貨者勅以鹽萬引與之仍許市引九萬臣等竊謂所市寶貨既估其直止宜給鈔若以引給之徒壞鹽法帝曰此朕自言非臣下所請其給之後勿視爲例

元史武宗紀大德十一年七月江浙湖廣江西河南兩淮屬郡饑於茶鹽課鈔內折粟遣官賑之十一月中

書省臣言前爲江南大水以茶鹽課折收米賑饑民
今商人輸米中鹽以致米價騰踴百姓雖獲小利終
爲無益臣等議茶鹽之課當如舊從之十二月中書
省臣言國用甚多帑藏已乏用及鈔母非宜鹽引向
從運司與民爲市今權時制宜從戶部鬻鹽引八十
萬便詔今歲姑從所請後勿復行至大元年二月淮
安等處饑從河南行省言以兩浙鹽引十萬質粟賑
之二年十二月尚書省臣言鹽價每引宜增爲至大
銀鈔四兩其煮鹽工本請增爲至大銀鈔四錢制可

元典章至大四年十一月江浙行省左右司都事言巡鹽不便事理除運司依例差委有職復請俸巡鹽人員每道不過三人約會所屬提點官一同依理巡禁私鹽外其餘鹽司不許濫設無職役之人豪強巡禁亦不許竈戶人等擅自搜捉擾民生事

元典章皇慶元年二月中書省奏預買來年鹽引除邊遠中糧鹽引外但依先例十分中收一分銀在先一錠銀折二十錠鈔來如今添五錠每一錠銀做中統鈔二十五錠

元典章江浙等行省准中書省咨據兩浙運司申延祐元年八月奉旨經國之費鹽課爲重比歲以來所司失於關防以致私鹽犯界鹽貨生發侵視官課澀滯鹽法應令所在管民管軍官常用心提調關防禁治

元史仁宗紀延祐元年六月增置兩浙鹽運司判官一員六年十月置兩浙鹽倉六所秩從八品官二員惟杭州嘉興二倉設官三員秩從七品鹽場三十四所場設鹽運一員正八品罷檢校所

續文獻通考延祐五年曹伯啟遷司農丞至江浙議鹽

法罷檢校官置六倉於浙東西設鹽運官輸運有期
出納有次船戶倉吏盜賣漏失有罰歸報著爲令

元典章延祐五年江浙行省准中書省咨兩浙運司申
錢塘縣靈隱寺僧人謝心玘違限不納退引四十五
道若不立法禁治其餘豪富土戶作弊影射私鹽無
可關防請立制以杜之尋刑部與戶部等同議今後
似此有犯若依私鹽法一體籍配終非眞犯如蒙比
例止科其罪相應都省准擬依上施行

元史英宗紀泰定元年溫州路樂清縣鹽場水民饑發

義倉粟賑之

續文獻通考 泰定二年祝大明管勾台州杜濱鹽場海潮溢損鹽以千百計寇民鬻家貲償官不足相率遁逃前吏莫敢爲計大明請於朝得減額三之一

元史文宗紀 天歷二年免各處煎鹽竈戶雜泛夫役至順二年二月中書省臣言天歷二年嘗以鹽賦十分之一折銀納之凡得銀二千餘錠今請以銀易官帑鈔本給宿衛士卒從之

續文獻通考 文宗天歷二年夏四月行省復請令商賈

八粟中鹽計一歲總辦之數約鹽總二百五十六萬四千餘引鹽課鈔總七百六十六萬一千餘錠

續文獻通考至順元年降璽書申鹽冶之禁三年定婦人犯私鹽罪著爲令甲

元史食貨志兩浙運司上言自至元十三年初立運司當時未有定額至十五年始立額辦鹽十五萬九千引自後引增十倍價增三十倍課額愈重煎辦愈難兼以行鹽地界所拘戶口有限前時聽從客商就場支給設立檢校所稱檢出場鹽帑又因支查停積延

祐七年比兩淮之例改法立倉綱官押船到場運鹽
赴倉收貯客旅就倉支鹽始則爲便經今二十餘年
綱場倉官任非其人惟務掊克況淮浙風土不同兩
淮跨涉四省課額雖大地廣民多食之者衆可以辦
集兩浙地界居江枕海煎鹽亭竈散漫海隅行鹽之
地裏河則與兩淮鄰接海洋則與遼東相通番船往
來私鹽出沒侵礙官課雖有刑禁難盡防禦鹽法廢
壞亭民消廢望選委德望重臣與拘該官府參酌時
宜更張法制惠濟黎元庶望大課無虧六年五月中

書省奏選官整治江浙鹽法命江浙行省右丞納麟
及首領等官提調

元史順帝紀至元元年四月以兩浙水災免歲辦餘鹽
三萬引十二月增設嘉興等處鹽倉二年杭州嘉興
紹興溫州台州等路各立檢校批驗鹽引所權免兩
浙額鹽十萬引

元史脫脫傳至正元年脫脫爲中書右丞相減鹽價蠲
積逋

元史食貨志至正二年十月中書右丞相脫脫平章鐵

木兒增識等奏兩浙食鹽害民爲甚江浙行省運司
屢以爲言擬合依世祖舊制除近鹽地十里之內令
民認買罷見設鹽倉綱運聽從客商赴運司買引就
場支鹽許於行鹽地方發賣革去派散之弊及設檢
校批驗所四處選任廉幹之人直隸運司如遇客商
載鹽經過依例稱盤均平俸法批驗引目運司官常
行體究又自至元十三年歲辦鹽課額少價輕今增
至四十五萬額多價重轉運不行今戶部定擬自至
正二年爲始將兩浙額鹽量減一十萬引

按元史鐵
木兒增識

傳作歲減額
一十三萬引
俟鹽法流通復還原額散派食鹽擬合

住罷從之

續文獻通考至正十二年盧琦尹永春奏減口鹽一百餘引

松江府志趙之章同知兩浙轉運特浚河運鹽以省陸運勞費又畱粟賑亭戶活饑民一萬四千一百七十二口

明史食貨志太祖初起卽立鹽法置局設官令商人販鬻二十取一以資軍餉旣而管徵之用胡深言復初

制丙午歲始置兩淮鹽官吳元年置兩浙

明會典洪武元年置兩浙都轉運鹽使司定歲辦鹽數每引四百斤給工本米一石以米價低昂爲準兼支錢鈔

明史食貨志洪武初諸產鹽地次第設官都轉運鹽使司六兩淮兩浙長蘆山東福建河東兩浙所轄分司四曰嘉興曰松江曰寧紹曰溫台批驗所四曰杭州曰紹興曰嘉興曰溫州鹽場三十五各鹽課司一

明史食貨志洪武時歲辦大引鹽二十二萬四百餘引

宏治時改辦小引鹽倍之萬歷時同鹽行浙江直隸之松江蘇州常州鎮江徽州五府及廣德州江西之廣信府所輸邊甘肅延綏寧夏固原山西神池諸堡歲入太倉餘鹽銀十四萬兩

明會典諸司職掌凡天下辦鹽去處每歲鹽課各有定額年終各該運司并鹽課提舉司將周歲辦過鹽課出給印信通關具本入遞奏繳本部委官於內府戶科領出立案附卷作數及查照繳到通關內該辦鹽課比對原額有虧照數追理其客商與販鹽貨各照

行鹽地方發賣不許變亂合用引目各運司申報本部委官關領本部將來文立案委官於內府印造候畢日將造完引目呈堂關領回部督匠編號用印完備明立文案給付差來官收領回還取領狀入卷備照其各處有司凡有軍民客商中賣官鹽賣畢隨卽將退引赴住賣官司依例繳納有司類解各運司運司按季通類解部本部塗抹不用凡遇開中鹽糧務要量其彼處米價貴賤及道路遠近險易明白定奪則例立案具奏出榜給發各司府州并淮浙等運司

張挂召商中納

明曾典兩浙都轉運鹽使司許村場仁和場嘉興分司

西路場鮑郎場蘆漑場海沙場橫浦場松江分司下

砂場青村場袁浦場浦東場天賜場青浦場下砂二

場後下砂三場

增

寧紹分司西興場錢清場三江場

曹娥場龍頭場石堰場鳴鶴場清泉場長山場穿山

場玉泉場大嵩場昌國正監場

正統五年裁革

溫台分司永

嘉場雙穗場長林場黃巖場杜瀆場長亭場天富南

監天富北監

明會典洪武初定鹽引目內條例凡客商與販鹽貨不許鹽引相離違者同私鹽追斷如賣鹽了畢五日之內不行繳納退引者杖六十將舊引影射鹽貨同私鹽論罪偽造鹽引者處斬

御撰資治通鑑綱目三編洪武三年立開中鹽法

明史食貨志山西行省請令商人於大同倉入米一石三斗給淮鹽一小引商人鬻畢卽以原給引赴所在繳之帝從之

明史食貨志召商輸糧而與之鹽謂之開中其後各行

省邊境多召商中鹽以爲軍儲鹽法邊計相輔而行道里近遠自五石至一石有差道遠地險則減而輕之鬻鹽有定所刊諸銅板犯私鹽者罪至死僞造引者如之勤窳有餘鹽送場司每二百斤爲一引給米一石其鹽召商開中不拘資次給與

明會典洪武三年令浙江等布政司并直隸府州縣官民人等戶口食鹽各隨地方徵收歲用糧多處徵米用糧少處徵鈔

明會典洪武四年令未食鹽官民人等一體見丁納鈔

支鹽大口十五歲以上月支鹽一斤納鈔一貫小口
十歲以上月支鹽半斤納鈔五百文

明會典洪武二十三年定兩浙各竈戶每丁歲辦小引
鹽丁六引引重二百斤復鹽工丁半之其餘工丁四
引

明會典洪武二十七年令優免鹽丁雜泛差役凡公侯
伯及文武四品以上官不得令家人奴僕行商中鹽
侵奪民利

明會典洪武二十八年令各處邊方缺糧本部奏請開

中納米定爲則例出榜召商於缺糧倉分上納仍先
編置勘合并底簿發各該布政司并都司衛分及收
糧衙門收掌如遇客商納完糧填寫所納糧并該支
引鹽數目付客商齎各該運司及鹽課提舉司照數
支鹽其底簿發各運司及鹽課提舉司收掌候中鹽
客商納米完齎執勘合到比對硃墨字號相同照數
行場支鹽

明會典洪武二十八年令兩淮兩浙鹽運司煎鹽工本
照各場額辦鹽數關鈔遺監生管運給散

御撰資治通鑑綱目三編永樂十四年九月始命御史巡

鹽

明會典永樂十七年令各處客商原中不拘資次鹽引
遇到卽支又令中鹽客商齋倉鈔赴運司運使查原
來印信比對明白卽與派場支鹽

明史食貨志仁宗立以鈔法不通議所以斂之之道戶
部尙書夏原吉請令有鈔之家中鹽遂定各鹽司中
鹽則例俱減舊十四

明史食貨志宣德元年停申鈔例三年夏原吉以北京

文武官吏軍夫工匠糧餉不支條上預備之策言中
鹽米舊則太重商賈少至請更定之乃定每引自二
斗五升至一斗五升有差

續文獻通考宣德四年令兩淮兩浙貧難竈丁除原額
鹽課照舊收納其有餘鹽者不許私賣俱收貯本場
運司造冊發附近州縣每一小引給米麥二斗

明會典宣德四年令各運使提舉司查勘中鹽客商土
民年遠事故者行原籍官司每引給資本鈔二十錠
五年罷差監生於兩淮兩浙給散煎鹽工本鈔每歲

照山東例於官庫內關領給散

明史食貨志正統元年始令侍郎何文淵王佐副都御史朱與言提督兩淮長蘆兩浙鹽課命內臣御史同往未幾以鹽法已清下敕召還後遂令御史視釐依巡按例更代以爲常

明史食貨志松江鹽課分司故隸兩浙鹽使官司處置失宜負課六十餘萬民訴於朝命直隸巡撫周忱兼理忱條上四事且請於每年正額外帶補逋課一分帝從其請命分逋課爲六以六載畢償之

明史食貨志商人有自永樂中候支鹽祖孫相代不得者乃議仿洪武中例而加鈔錠以償之願守支者聽又以商人守支年久雖減輕開中少有上納者議他鹽司如舊制而淮浙長蘆以十分爲率八分給守支商曰常股二分收貯於官曰存積遇邊方急需召商中納常股存積之名由此始凡中常股者價輕中存積者價重然人甚苦守支爭趨存積而常股壅矣

明史食貨志初浙江軍民計口月納米三升買鹽一斤而商賈持盈赴官官爲斂散迫徵之急過於租賦帝

從給事中鮑輝言令民自買食鹽於商罷計口月給之令私鬻鹽十斤以下者勿以私鹽論

明會典正統元年令各處有首獲私鹽者鹽入官以鈔照時直給償

明會典正統二年裁革寧波府岱山蘆花二場鹽課歸并大嵩場鹽課司催辦

舊兩浙巖志正統二年令各處竈丁有犯俱免納米及調場除歲辦額鹽外令每日煎鹽三斤計日贖罪

明會典正統三年令兩淮兩浙長蘆等運司每歲各差

御史一員領敕巡視禁約催督鹽課

明會典正統三年令各處徵收戶口鹽鈔俱減半徵收
官吏并隨任大口全徵未出幼男女及孤寡殘疾軍
匠人口免徵

明史食貨志正統三年寧夏總兵官史昭以邊軍缺馬
奏請召商納馬中鹽上馬一匹與鹽百引次馬八十
引旣而定邊諸衛遞增二十引其後河州中納者上
馬二十五引中殺五引松潘中納者上馬三十五引
中殺十引久之復如初制中馬之始驗馬乃掣鹽旣

而納銀於官以市馬銀入布政司宗祿屯糧修邊賑濟輾轉支銷銀盡而馬不至其弊日甚而邊儲告匱於是召商中存積鹽以給之令甘肅中鹽者淮鹽十七浙鹽十三淮鹽惟納米麥浙鹽兼收豌豆青稞因淮鹽值貴商多趨之故令淮浙兼中也

浙江通志正統三年用侍郎周忱議以竈去場三十里者爲水鄉竈戶不及三十里者爲濱海滷丁水鄉丁歲出米六石給濱海滷丁代煎

浙江通志正統四年復竈戶稅糧毋遠運工本鈔自此

罷給

浙江通志正統五年并昌國場於穿山設下砂二三場
舊兩浙鹽志兩浙年額引鹽四十四萬四千七百六十
九引一百四十九斤二兩內常股鹽三十一萬一千
三百三十八引一百六十四斤六兩二錢存積鹽一
十三萬三千四百三十引一百八十四斤一十一兩
八錢

明會典正統六年令兩淮兩浙勸借支鹽客商米麥收
積該場賑給貧難竈丁其該支引鹽仍挨次放支

明會典正統八年奏准永樂洪熙宣德年間客商原中淮浙長蘆運司引鹽願兌支河南山東福建運司者每一引支與二引不願者聽其守支十年令客商年久不得支鹽願兌支者如係原中地方准量各場遠近三七關支非原中地方一引兌與二引者量地遠近中半關支

舊兩浙巉志正統九年令各鹽課司每窰戶添撥餘丁二人免其差役專一採薪煎鹽

明會典洪武間戶部鹽引印及鹽糧勘合并引由契本

銅版俱收貯內府戶科編號木記收貯戶部凡遇各處急缺糧草則戶部奏請印刷編定召商開中正統十一年以戶部改爲南京戶部具奏鑄換印與銅版各增南京二字於戶部之上仍收貯在京內府戶部遇開中本部差官至彼印刷編定齎赴開中處所給發

舊兩浙離志兩浙額鹽分派各鎮坐派各倉上納糧草完日該倉出給倉鈔類申巡撫衙門出給勘合每勘合一張或填二千引或填二千一百引各鎮勘合俱

係南京戶部發各該巡撫管糧衙門填給兩浙額鹽
共計勘合二百九十五道各鎮額鹽淮浙兼支七分
派淮三分派浙蓋因淮引稍貴其餘各運司鹽引稍
賤故以淮為主以兩浙長蘆山東爲配

明會典正統十四年令增兩淮兩浙存積鹽爲四分召
商供給邊儲

明會典景泰元年差侍郎二員清理兩淮兩浙鹽課二
年取回兩浙巡鹽御史令鎮守侍郎兼理鹽法三年
令巡河御史兼理兩浙鹽法裁省巡鹽御史

金匱要略卷之二十一
明會典景泰元年奏准兩浙運使各場凡近場滴丁令於鹽場煎辦鹽課水鄉窳戶離場三十里之外者每丁歲出米六石或折收價物置立倉庫收貯委官專掌按季查算滴丁代納鹽數若干照名給與食用

明會典景泰元年令各商中到存積官鹽人到卽支其常股鹽每年依期將見在商人挨次量高低場分派搭封驗引目赴場關支備將商名貫址勘合字號米鹽數目搭派場分造冊繳部年終仍將放支過商名鹽數類造總冊送部查照

明會典景泰元年令增兩淮兩浙存積鹽爲六分又令
竈丁餘鹽每引給米淮鹽六斗浙鹽四斗又令各處
商人引鹽出遷延三月不去者拘收入官

舊兩浙鹺志景泰元年令各運司提舉司及所屬鹽課
司原有山場灘蕩供採柴薪者不許諸人侵占其年
久逃移竈丁卽於見在竈戶內以空閒竈丁撥補

明會典景泰二年令客商報中鹽數遷延一年之上不
報完者卽於常股鹽內派撥挨次關支

明史食貨志時官吏食鹽多冒增口數有一官支二千

餘斤一吏支五百餘斤者乃限吏典不過十口文武官不過三十口大口鈔十二貫支鹽十二斤小口半之景泰六年始以鹽折給官吏俸糧以百四十斤當米一石

舊兩浙鹽志景泰七年詔淮浙長蘆山東運司所屬鹽稅課司地方近因災傷人民饑窘各該巡鹽御史通行取勘逃亾事故竈丁無人頂補遺下未辦本年五月以前各處鹽課明白具奏報除豁以蘇民困

舊兩浙鹽志天順元年詔淮浙長蘆等鹽運司景泰七

年十二月以前拖欠未完鹽課悉與蠲免原派客商引鹽改派別鹽於天順元年以前課內關支

明會典成化二年令戶口鹽應納米者仍舊納米應納鈔者錢鈔中半兼收

舊兩浙鹺志成化四年禁官員占中引鹽詔曰朝廷開中鹽糧本爲實邊儲省轉輸乃利國經久良法近聞各邊開中鹽糧內外官員家詭名開報包中鹽引又令家人子弟將不堪米麥上納有或轉賣與人徒手得錢及轉賣之人先用價錢過多卻稱斗頭太重具

告官府因而減數上納各邊鎮守總兵巡撫等官非但不行禁革并有曲徇人情聽令通同官攢斗級或將官軍應支月糧指厰作數或將關中積年陳米相沿進納虛出通關有自行包占鹽引轉賣與人先將本處米麥收積臨期增價或插和糠粃糶與客商上納似此姦弊非止一端以致邊廩空虛軍餉缺乏今後遇有開中都依戶部奏准事理並不許內外官員家中納包占其各商引數亦不許過多附近許戶部報名路遠并見在各邊居住者赴巡撫等官處報名

都在監臨等官務存公道不許扶同作弊虧損邊儲
如違在內從戶科給事中叅奏在外從巡撫并巡按
御史糾察

浙江通志成化五年戶部疏令水鄉竈丁歲辦鹽二引
以上者輸米四石三引以上者米六石併故所得草
蕩仍給灔海竈丁代煎

明會典成化六年令免今年各處戶口鹽鈔以後不許
折收銀米

明會典成化七年令兩淮兩浙運司各場存積鹽課仍

舊止作四分常股增爲六分

舊兩浙鹽志成化七年詔各處鹽場有因風雨損壞倉廩消化鹽課曾經風憲官驗勘明白者盡行蠲免其成化六年有因災傷無力煎辦曾經奏報勘實者應辦鹽課以十分爲率減免三分

浙江通志成化九年令兩浙巡鹽御史督同分巡分守并運司官清查竈丁其絕戶及寡婦鹽課照數開豁以清出多餘滿丁頂替再有餘丁照例辦課幼丁候長成辦鹽俱造冊備照仍類造送部自後每十年一

次

明會典成化十年令戶口鹽價起解京庫錢鈔兼收每鈔一貫折錢千文存留本處願納米者聽願納鈔者照舊

浙江通志成化十年巡撫右副都御史劉敷以濱海逋課累水鄉疏改水鄉鹽引折銀五錢三分場各輸於其長運司會而輸戶部備邊用此水鄉輸銀之始

舊兩浙鹽志成化十二年奏准鹽丁除正役里甲該辦糧草外其餘雜泛差役丁少者蠲免丁多者亦量加

減除

浙江通志 成化十二年詔覈水鄉蕩價解運司此草蕩徵銀之始

明會典 成化十八年增置天賜溝場并大使副使二員以蕩濱場原額鹽課派撥三分之二煎辦

明會典 成化十九年令兩浙鹽課浙西場分每正鹽一引折銀七錢浙東場分每正鹽一引折銀五錢解送太倉銀庫候餘鹽支盡仍納本色

浙江通志 成化二十年御史林誠以廢鹽多耗疏令濱

海竈鹽並許輸半價浙西引三錢五分浙東引二錢五分歲十月輸京師此濱海本折色鹽之始

舊兩浙嵯志成化二十一年詔成化二十年十二月以前各處鹽運司鹽課提舉司拖欠鹽課悉與除豁其有被水淹沒鹽課曾經風憲官勘實及折罰鹽糧年久追未完客商失落截角退引亦皆免追

舊兩浙嵯志成化二十一年禁勢要中鹽詔曰茶鹽之利國用所資近年以來招商不肯上中皆因勢要之家撥支攬買及夾帶私販侵其利今後開中茶鹽不

許勢要及現任官員之家上中及夾帶販賣侵奪民利違者治以重罪茶鹽入官

浙江通志成化二十一年增邊商浙鹽價每大引輸銀一錢六分松江府知府樊瑩疏請以蕩價抵水鄉鹽課之半立蕩戶收之餘半於各縣秋糧加耗餘米帶徵而丁盡歸有司應民役此州縣包補水鄉額鹽之始

舊兩浙鹽志成化二十三年禁勢要中鹽詔曰糧鹽國用所資近年以來欽賞數多及被內外勢要之人奏

討奏買存積常股盤剝私餘鹽斤攬越支賣夾帶私
販以致上損國課下奪民財詔書到日各該巡按巡
鹽御史卽查前項鹽課已支賣外其未支掣者各住
支還官今後行鹽各照地方不許越境販賣各邊開
中引鹽及糶賣糧草俱不許勢要及內外官員之家
求討占窩領價上納亦不許巡撫管糧等官徇情受
囑違者許巡按御史糾舉

舊兩浙鹺志成化末奏准水鄉不諳煎燒竈丁該辦鹽
斤每年小引出銀三錢五分傾銷五十兩作一大錠

解司年終類解戶部

明史食貨志初存積之開中也商人樂有見鹽報中者爭至淮浙鹽不給乃配支長蘆山東鹽以給之道遠不能赴支邊商輒貿易於近地富人自是有邊商內商之分邊商之鹽不能速獲內商之引又不賤售報中寔忘存積之滯遂與常股等

明史食貨志憲宗末年閹宦竊勢奏討淮浙鹽無算孝宗初鹽法壞戶部尙書李敏請簡風憲大臣清理乃命戶部侍郎李嗣於兩淮刑部侍郎彭韶於浙俱兼

都御史賜敕遣之

明史彭韶傳韶以商人苦抑配爲定折價額蠲宿負憫
竈戶煎辦徵賠折閱之困繪八圖以獻因條利病六
事悉允行

浙江通志宏治元年侍郎彭韶疏減濱海折半鹽價浙
西引輸銀三錢浙東引一錢七分五釐二年疏鬻兩
浙餘鹽引價一錢四分此本處賣鹽之始又疏減水
鄉歲課引輸銀三錢濱海歲課常股引一錢五分存
積輸鹽如故

明史食貨志侍郎彭韶言近日有勸借鹽商銀米賑濟之令請令買商人餘鹽以補官引而免其勸借且停各邊開中俟課完之日於本司發賣三分價值二充邊儲而畱其一以補商人未支之價又言鹽課宿逋不可復徵請酌久近量爲輕減皆命從之於是竈丁獲寬卹

明會典宏治二年令兩浙水鄉竈丁每鹽一引納銀六錢煎辦竈丁存積鹽課仍納本色常股每引折銀三錢候商支給將價照例於勤煎竈戶餘鹽內插買補

課各項該納銀兩解到運司聽巡鹽御史委官解京
明會典宏治二年令兩浙運司各場竈丁有離場三十
里內者全數煎辦三十里外者照水鄉事例全准折
銀每年十月以裏徵完解送運司類解本部

明會典宏治二年令各處秤掣引鹽止許批驗所官若
本無所官方委運司官有司不得干預

御撰通鑑綱目三編宏治五年冬十月更中鹽法明初於
各邊開中令商人募民墾種築臺堡自相保聚邊儲
以充成化時始以銀易米然未嘗著爲令也至是戶

部尚書葉淇召商納銀令運司類解太倉分給諸邊
每引輸銀三四錢有差視國初直加倍而商無守支
之苦一時太倉銀累至數百萬然赴邊開中之法廢
商屯撤業菽粟翔貴邊儲日虛矣

明會典宏治八年令兩浙運司竈戶若事故例當新僉
者止許府縣查補照例報銀滷丁事故方許運司勾
充俱明立簿籍查考其場官催目人等敢有將銀課
改作鹽課竈戶捏作滷丁一概朦朧勾擾者俱問以
枉法贓罪

浙江通志 宏治十二年廢鹽台二批驗所御史藍章增
餘鹽價引一錢八分都御史王瓊御史邢昭繼增之
引價二錢

舊兩浙鹺志 正德五年詔曰各處商人先年報中糧草
已納在官未給鹽引者照數給與見鹽未納者悉皆
釋放免賠各年風雨消折等項殘鹽已有旨准買外
今後一應商人勢要人等俱不許違例奏討以致阻
壞鹽法有悞邊儲違者定行重治

續文獻通考 正德五年議准鹽課不許於腹裏地方中

賣亦不許奏開殘鹽以遂商人姦計待各邊奏有缺
乏本部開送各邊報中本色糧草不許折納銀兩

舊兩浙鹺志正德五年詔淮浙各鹽運司近年查追拖
欠遠年鹽課將竈追逼逃竄或有淹禁致死者除已
經開中有引照舊煎辦給商及存積在官聽候中賣
外其餘自正德四年以前未經開中額數拖欠或堆
積年久風雨消折等項巡鹽御史勘實一體蠲免遇
有納剩餘鹽或小民自行煎辦鹽斤不多者仍照舊
例許令本處貿易不在與販私鹽之例

舊兩浙離志正德五年除賠價而曰各處商人報中糧
草近因新例不給價銀及反賠原價已令該部給價
免追詔書到日俱依舊例報中上納照數給價原欠
者陸續補給官糴糧米盡行停止

浙江通志正德六年增邊商浙鹽價每大引輸銀一錢
八分八年減除鹽價仍一錢八分

浙江通志正德九年御史師存智疏請以本色引鹽卽
於兩浙開中引價三錢鹽貴則稍昂其直批驗所割
沒餘鹽亦遂與商聽輸價嘉興批驗所引五錢温州

二錢紹興四錢杭州四錢五分歲輸戶部凡商鹽餘
鹽及包索不得過三百斤違者沒入之

舊兩浙鹽志正德十三年令各運司但係濱海竈應辦
額鹽及應納因鹽俱收本色給商不許折收價銀派
及各商買補違者聽巡鹽御史等官嚴加禁治

續文獻通考正德十四年令各運司今後割沒餘鹽不
拘多寡俱令本商照依時估納銀中賣量加火耗以
資解人路費若本商乘機夾帶賄通官吏不行盡數
掣割者盤鹽入官官吏坐以枉法贓罪照例問遣

續文獻通考正德十六年奏准織造段匹再不許奏討
鹽價違者許部科論奏

浙江通志嘉靖六年增邊商浙鹽價每大引輸銀四錢
七年御史王朝用疏令瀕海折色水鄉竈鹽引輸銀
二錢三分七釐貯運司而以二錢給商買鹽曰買補
其三分七釐暨諸割沒餘鹽價仍輸京師此給買補
之始

舊兩浙鹽志嘉靖六年嚴禁私鹽詔曰鹽利乃民生所
須近來官鹽阻滯不通鹽價高貴民食艱難而濱江

濱海鹽徒與販無忌私鹽船隻多至數百往來大江
張打旗號擅用火器兵器停泊地方貪利之徒公然
替伊轉販遇有商民船隻因而劫掠卽今江南各府
民間所食多是私鹽官引阻塞著巡鹽巡江御史督
令各該巡鹽巡捕官司將鹽徒上緊設法挨拏務要
盡絕仍根究官鹽何以不通私鹽何以盛行應自處
置者徑自處置事體重大者奏請定奪務使官鹽疏
通鹽商得利課額不虧邊儲有賴若鹽徒勢衆原設
巡鹽巡捕人役不敷巡按巡江都御史酌量緩急調

兵擒捕無令滋蔓以貽地方之害

舊兩浙鹺志嘉靖七年戊子春敕戶部曰甘肅邊儲久缺其詳畫經久之策以聞胡世寧曰永樂中邊儲悉藉鹽法每鹽一引輸粟二斗五升富商悉聚邊鄙自行耕墾樹藝兼築保聚所以兵強食足天順成化中輸金戶部商賈不復在邊芻粟悉資挽運轉販艱難益以饑荒價遂騰踊宜復鹽法以舒邊困霍韜亦云宜復鈔法以存竈戶輕引銀以來商賈上嘉納之

舊兩浙鹺志常股鹽逐年開中聽商上納糧料以備主

兵之用存積鹽遇有緊急缺乏聽商上納糧料以備
客兵之用自嘉靖十年以後不分常股存積盡數開
邊召商中納

浙江通志嘉靖十一年戶部疏減甘肅浙鹽價每大引
輸銀三錢

舊兩浙鹽志嘉靖十二年題准清理竈丁均分蕩地將
實在鹽課通行各場照依見在丁數均勻辦納其草
蕩先爲豪強兼并逐一查出均撥聽巡鹽御史每五
年一次親詣各場將竈丁逐一清審事故者開除成

丁者僉補先年有將竈蕩丈量入民額者有徵銀充
兵餉者有司見蕩成熟輒議陞課今後新漲荒蕩及
開墾熟蕩盡數分給各竈煎辦計畝徵銀不許有司
容令部民妄行爭奪

浙江通志嘉靖十六年題准兩浙官商不到之處立爲
山商鉛山弋陽貴溪永豐清江昌化浦江武義東陽
義烏湯溪永康建德桐廬壽昌慶元宣平縉雲景寧
雲和二十縣每程一張納銀六錢餘杭富陽臨安新
城嘉興秀水嘉善崇德桐鄉德清武康諸暨新昌嵯

縣奉化泰順青田十七縣每程一張納銀四錢三分其餘坐場縣分容令竈丁肩挑易賣仍修復松江分司令分司官駐劄督課

明史食貨志令山商每百斤納稅銀八分給之票使行於僻邑官商不至之處其後票鹽多侵奪正引官商日少課引壅二百萬候掣必五六載於是有預徵執抵季掣之法預徵者先期輸課不得私爲去留執抵者執見在運鹽水程復持一引以抵一引季掣則以納課先後爲序春不得遲之夏夏不得超於春也然

票商甫納稅卽掣而賣預徵諸法徒厲引商而已

〔浙江通志〕嘉靖二十年題准台州府長亭黃巖杜濱三場引目一票作爲一引每票照鹽三百斤納銀九分

〔舊兩浙漕志〕嘉靖二十四年題准兩浙運司歲辦水鄉鹽課照舊折價解部存畱在場鹽課徵收折色解貯運司給商自行下場買鹽聽掣

〔浙江通志〕嘉靖三十年題准將給商正鹽二百斤外再加餘鹽一百斤連前餘鹽五十斤共一百五十斤

〔明史食貨志〕嘉靖三十一年添設兩淮浙江諸處巡鹽

都御史

御撰通鑑綱目三編嘉靖三十九年春正月以鄆懋卿總理鹽政舊制無一人總理四運司者至是懋卿以嚴嵩力總理兩浙兩淮長蘆河東鹽政驟增鹽課四十餘萬

舊兩浙鹺志先年關引原無定期嘉靖四十年都御史鄆懋卿題定關引以四月爲期

明史食貨志舊事官民戶口食鹽皆計口納鈔自行關支京官歲遣吏下場恣爲姦利錦衣吏益暴率聯巨

艦私販有司不能詰巡鹽御史乃定百官食鹽數攜束以給吏禁毋下場納鈔俛輓費無所出吏多亾吏部郎中陸光祖言於尚書嚴訥疏請革之自後百司停支食鹽惟戶部十三道歲支如故

明史食貨志嘉靖四十四年巡鹽御史朱炳如奏罷兩淮工本鹽自工本鹽之行引鹽不易掣邊商多乞掣河鹽河鹽者在河徑掣不上廩困易支而獲利疾迨工本旣罷掣河鹽如故後復議於正鹽外附帶餘鹽以抵工本之數云

明史食貨志隆慶二年屯鹽都御史龐尙鵬疏陳鹽法二十餘事多所興革帝皆從之其論邊商內商曰邊商報中內商守支事本相須但內商安坐邊商遠輸勞佚不均故掣河鹽者以惠邊商也然河鹽既行堆鹽必滯內商無所得利則邊商之引不售今宜停掣河鹽但別邊商引價自見引及起紙關引到司勘合別爲三等定銀若干邊商倉鈔已到內商不得畱難蓋河鹽停則堆鹽日速引價定則開中自多邊商內商各得其願矣

浙江通志隆慶二年題准額課改行小鹽以隆慶三年
爲始每引定以正鹽二百斤外加包索三十斤帶餘
鹽七十斤共三百斤爲定例每引餘鹽七十斤納銀
一錢四分五釐比舊每引少銀一錢五分五釐將內
商派引執照紙張中津橋票稅與各近便場戶買補
折色引鹽等項銀兩加增抵補仍查照戶部近議存
積三分改中本司每引加銀二錢上下以抵補前課
之額

明史食貨志隆慶四年御史李學詩議罷官買餘鹽帝

從之

舊兩浙鹽志隆慶四年總理巡鹽撫臣龐尚鵬奏寧夏鹽引俱係土人中納本重利微勘合常不得給往往爲姦商所截買宜如近例各商勘合凡足三千引以上者悉行填給其應補勘合聽撫臣咨部給發但本鎮浙鹽多淮鹽少而淮鹽利浮於浙宜通融派補其中途截買者仍酌議定價以祛抑勒之姦

浙江通志隆慶六年奏准寧波府所轄五縣松江所轄二縣共一十四場俱無住賣商引又未議行票鹽令

僉選牙埠置立簿票每票一張照鹽三百斤納銀一錢四分

續文獻通考萬歷六年題准兩浙鹽課每年終總計完欠分數將各運司縣場掌印管鹽官照依京庫錢糧事例分別叅奏

續文獻通考萬歷六年題准兩浙巡鹽御史嚴督運司將杭嘉紹三批驗所每季掣鹽俱以掣畢日爲始五十日內盡數交完餘鹽等銀印給限帖發運行鹽地方住賣違者問罪如違十日以外卽將引鹽追沒三

分之一二十日以外追沒三分之二一月以外盡沒入官如有風雨等項阻滯量行寬假

舊兩浙巖志萬歷六年題准南京戶部自萬歷二年以後鹽引勘合以二千引爲一道照數刷完轉發各邊收掌如遇商人完納糧草卽行填給邊商投遞底簿隨卽領出日後領價撥引專以底簿爲憑商人報中浙鹽責令該倉出給倉鈔比對底簿相同用印鈐蓋付與本商隨便投遞運司其底簿另封付商齎至管糧衙門掛號聽本商親領親執親投領價撥引

舊兩浙鹽志萬歷七年十一月戶部覆准永嘉等場改認仁許二場買補引目減去引價一錢五分止追銀二錢浦東青浦袁浦改認下砂青村買補引目減去銀三分止追銀一錢四分蘆溼場改認西路買補引目減去銀四分止追銀八分恐京解不敷將紹興所餘鹽每引加銀一分及將續增稅票沙蕩等銀抵補前數

舊兩浙鹽志萬歷七年題減仁許等場搭派折色銀兩議將浙東場分引目每引加增餘鹽銀一分續將紹

與所引鹽每引加耗鹽十斤以補多徵餘鹽之數杭
州等所不得援此例

舊兩浙誌志萬歷十年巡鹽御史孫旬疏言往年關引
以四月爲期然回司無定限邊商得以賄囑遷延而
新引不繼則不免於停鹽以待引行用無定時內商
得以營求分撥而舊引以壅則不免於減價以速沽
莫若酌闕請之期嚴往回之限定行引之規平撥引
之價旋定每年關請引定於四月初旬毋得過初十
之外計程往返限以五箇月內毋得過八月之終

舊兩浙歲志萬歷十年題准各直省凡遇商人運到引鹽掌印官驗令原編牙鋪照依時值貨賣不許仍前分派里甲大戶馬頭鄉長致害小民其緝獲私鹽秤驗上厥開報運司撥商支掣如有消折量減斤數毋致鋪戶賠累

舊兩浙歲志萬歷十四年議定竈戶煎鹽除完課給商外多餘鹽斤無人收買必歸私販請動支沙地銀關發四分司轉給各場官隨時對竈收買各場官以報鹽之多寡定考績之殿最

明史食貨志萬歷二十六年百戶高時夏奏浙閩餘鹽歲可變價三十萬兩巡按勘皆妄因言浙江歲課正額止十四萬今餘鹽乃十五萬乎疏入不省於是浙江解三萬七千兩有奇借名增加商因而引壅戶部尙書趙世卿指其害言內取一分之稅則課少一分之供而徵解愈遲國計愈絀請悉罷無名浮課不報

鹽法考萬歷三十七年巡鹽御史韓浚以國初丁蕩有額鍋盤有數法本至善乃今昔變遷有昔稱多鹽而今坍沒殆盡者買補不足多守候而悞季掣有昔稱

無鹽而今斤酒有餘者買補不盡悉輟轉而入私販
宜概行清審坍塌損者捐之新漲者增之悉按見在之
丁蕩爲損益之多寡而場竈商支無不均之患矣

舊兩浙鹺志萬歷三十九年十月巡鹽御史張惟任奏
兩浙各場竈蕩之隱占漏匿者清出稅銀一萬八千
四百餘兩徵補商價積負從之

明史食貨志帝用李太后遺誥蠲各運司浮課商困稍
甦

舊兩浙鹺志萬歷四十二年四月陝西道御史劉廷元

疏稱加稅貽累非法乞將兩浙新陞蕩稅立賜全免
敕令新增蕩稅一萬八千有奇減去一半

舊兩浙巉志萬歷四十二年九月巡鹽御史楊鶴題請
每年帶銷五萬餘引之數量銷一萬其五年清丁清
蕩著實舉行令民戶占種窳產者於常課之外量加
包補新漲沙塗之稅以抵坍塌蕩地之課

舊兩浙巉志萬歷四十三年九月戶部議覆巡鹽御史
崔爾進題每年帶銷舊引一萬每引加銀三釐於原
派京庫正解毫髮無虧公私兩便從之

明史食貨志時行鹽中引者曰邊商支掣者曰內商運賣者曰水商而三商之外別有國戶阻壞鹽法大抵由之三商盡困鹽引大滯於是巡鹽御史龍遇奇奏立鹽政綱法以舊引附見引行之計十餘年則舊引盡行矣

東陽縣志天啓間尙書許宏綱建議將原裁弓兵工食抵扣鹽斤聽民肩挑勿禁於是台鹽盛行而貧民皆得自食其力後邑商以課額具呈所司而復其禁

明史食貨志天啓時言利者恣掇括魏忠賢黨郭興治

崔呈秀等巧立名目以取之所入無算論者比之絕
流而漁崇禎中給事中黃承昊條上鹽政頗欲有所
更革是時兵餉方大絀不能行也

浙江通志崇禎十四年用御史馮垣登言建松江所轄
掣崑常嘉太華婁上青等州縣引鹽

上海縣志崇禎時都運使張繼孟蠲無業丁銀又令水
鄉與濱海一體僉充催役

欽定重修兩浙鹽法志卷二十終